

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst („Službene novine Zeničko-dobojskog kantona“, broj: 7/10), na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona na 97. sjednici, održanoj 01.06.2017. godine,
d o n o s i

ZAKLJUČAK

I.

Prihvata se Izvještaj o radu Javne ustanove Centar za djecu i odrasle osobe s posebnim potrebama Zeničko-dobojskog kantona za 2016. godinu.

II.

Izvještaj iz tačke I. ovog zaključka upućuje se u dalju skupštinsku proceduru.

III.

Zaključak stupa na snagu danom donošenja.

Broj: 02-_____/17.
Datum, 01.06.2017. godine
Z e n i c a

PREMIJER

Miralem Galijašević

DOSTAVLJENO:

1x Stručna služba Skupštine,
1x Ministarstvo za rad, socijalnu politiku i izbjeglice,
1x JU Centar za djecu i odrasle osobe s posebnim potrebama
Zeničko-dobojskog kantona (putem Ministarstva),
1x a/a.

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
JU CENTAR ZA DJECU I ODRASLE OSOBE S POSEBNIM POTREBAMA

Broj: 01-05-5-5-1/17
Zenica, 09.06.2017. godine

**Izvještaj o radu
Javne ustanove Centar za djecu i odrasle osobe s posebnim potrebama
Zeničko-dobojskog kantona
za period januar-decembar 2016. godine**

Zenica, juni 2017. godine

Sadržaj:

1. Uvod.....	3
2. Korisnici usluga Javne ustanove	3
3. Struktura zaposlenih Javne ustanove.....	4
4. Odjeljenje Javne ustanove za rano podsticanje razvoja i ranu intervenciju za djecu s posebnim potrebama u Zenici	4
5. Poslovna jedinica Javne ustanove Dnevni centar Visoko	7
6. Poslovna jedinica Javne ustanove Dnevni centar Tešanj	10
7. Dnevni centar Javne ustanove za odrasle osobe s posebnim potrebama Zenica - istureni dio	11
8. Saradnja Javne ustanove sa drugim ustanovama, udruženjima i stranim partnerima	12
9. Rezime.....	12

1. Uvod

Javna ustanova Centar za djecu i odrasle osobe s posebnim potrebama Zeničko-dobojskog kantona (u daljem tekstu: Javna ustanova) osnovana je Odlukom Skupštine Zeničko-dobojskog kantona, broj: 01-5-16268/14 od 18.08.2014. godine („Službene novine Zeničko-dobojskog kantona“, broj: 4/14, od 28.08.2014. godine), sa ciljem i zadacima ranog podsticanja razvoja i rane intervencije za djecu s posebnim potrebama predškolskog uzrasta, te edukaciju i rehabilitaciju djece i odraslih osoba sa posebnim potrebama sa područja grada/općina Zeničko-dobojskog kantona koje nisu u mogućnosti da redovno pohađaju školu ili im je potrebna pomoć stručnih lica, bilo kroz grupni rad ili ambulantni – mobilni oblik rada.

Ciljevi i zadaci Ustanove su:

- rano podsticanje razvoja i rana intervencija za djecu s posebnim potrebama predškolskog uzrasta,
- odgojno-obrazovni rad sa djecom i odraslim osobama s posebnim potrebama sa područja grada/općina Zeničko-dobojskog kantona, s ciljem izgradnje ličnog identiteta, socijalne integracije, izgradnje kompetencija od životnog značaja, pripreme za život, a prema prilagođenom individualnom planu i programu,
- habilitacija i rehabilitacija, te podsticaj djece i mladih osoba s posebnim potrebama kroz individualne i grupne rehabilitacijske i podsticajne mjere,
- dnevno zbrinjavanje djece i odraslih osoba s posebnim potrebama,
- radno osposobljavanje i rehabilitacija odraslih osoba s posebnim potrebama sa područja grada/općina Kantona,
- program podrške porodici kroz neposredni savjetodavni i edukacijski stručni rad.

Od osnivanja pa do kraja 2015. godine, Javna ustanova je obuhvatala isključivo Centar za rani podsticaj razvoja i ranu intervenciju u Zenici. 01.01.2016. godine u sastav Javne ustanove je ušla i Poslovna jedinica Dnevni centar za djecu i odrasle osobe s posebnim potrebama Visoko (u daljem tekstu: Dnevni centar Visoko), a od 01.04.2016. godine i Poslovna jedinica Dnevni centar za djecu i odrasle osobe s posebnim potrebama Tešanj (u daljem tekstu: Dnevni centar Tešanj). Od septembra 2016. godine, Javnoj ustanovi priključen je Dnevni centar Zenica, koji pohađaju korisnici stariji od 21 godine. Ovaj Dnevni centar svoju nastavu organizuje u prostorijama JU „Dom porodica“ Zenica, a kao ispostava Dnevnog centra Visoko, pod čijim je direktnim rukovodstvom.

2. Korisnici usluga Javne ustanove

Korisnici Ustanove su:

- djeca predškolskog uzrasta sa jasno izraženom ometenošću ili rizikom od nastajanja ometenosti kojoj roditelji ili drugi ovlašteni skrbnici ne mogu pružiti odgovarajući psihički ili fizički podsticaj, zbog čega im je neophodna adekvatna intenzivna terapijska i edukacijsko-rehabilitacijska pratnja,
- djeca školskog uzrasta s posebnim potrebama sa područja Zeničko-dobojskog kantona koja se ne mogu uključiti u redovan obrazovni proces zbog svojih posebnih potreba,
- djeca koja pohađaju redovni obrazovni proces, a imaju potrebe za uslugama Ustanove, shodno kadrovskim, materijalnim i tehničkim mogućnostima,

- odrasle osobe sa posebnim potrebama koje imaju potrebe za uslugama osposobljavanja za samostalan život i rad, te radnu rehabilitaciju.

3. Struktura zaposlenih Javne ustanove

U Javnoj ustanovi, na dan 31.12.2016. godine, bilo je 30 zaposlenih i to: direktor, referent za administrativno-finansijsko poslovanje, 4 logopeda, 6 edukatora – rehabilitatora (od kojih jedna na porodiljnom dopustu), 4 socijalna pedagoga, 1 psiholog, 3 fizioterapeuta, 4 asistenta (od kojih jedna na porodiljnom dopustu), 2 radna instruktora, 2 vozača, kuhar i domar.

Po ugovoru o djelu je angažovana spremačica koja obavlja poslove čišćenja prostorija Dnevnog centra u Visokom (3 dana sedmično) i prostorija u kojima djeluje Odjeljenje za rano podsticanje razvoja i ranu intervenciju za djecu s posebnim potrebama u Zenici (2 dana sedmično).

U Dnevnom centru Visoko je posredstvom njemačke organizacije „Eirene“ angažovan i volonter.

4. Odjeljenje Javne ustanove za rano podsticanje razvoja i ranu intervenciju za djecu s posebnim potrebama u Zenici

Odjeljenje za rano podsticanje razvoja i ranu intervenciju za djecu s posebnim potrebama se finansira djelimično iz budžeta Zeničko-dobojskog kantona, a dijelom iz budžeta općina ZDK. JU Centar za djecu i odrasle osobe s posebnim potrebama ZDK je u toku 2016. godine imala potpisan Ugovor za finansiranje usluga ranog podsticanja i rane intervencije sa općinama: Breza, Kakanj, Olovo, Vareš, Zavidovići, Žepče, Tešanj i gradom Zenica.

Grad Zenica i općina Žepče su obaveze iz Ugovora o sufinansiranju izvršile u drugoj polovini 2016. godine, ali po starom Ugovoru o sufinansiranju, odnosno po Ugovoru iz 2015. godine.

U izvještajnom periodu, ukupno je 182 djece koristilo usluge Odjeljenja za rano podsticanje razvoja i ranu intervenciju za djecu s posebnim potrebama u Zenici (u daljem tekstu: Odjeljenje). Za 66 korisnika je podsticaj okončan, a na ulaznoj dijagnostici je bilo 100 djece, dok je prosječno na mjesečnoj osnovi podsticaje koristilo oko 87 djece.

U tabeli 1. dat je pregled zastupljenosti korisnika po gradu/općinama.

Tabela 1

Tešanj	Maglaj	Žepče	Zavidovići	Zenica	Kakanj	Visoko	Breza	Olovo	Vareš	Usora	Doboj Jug	Ukupno:
-	1	17	12	108	6	19	5	12	2	-	-	182

Djeca s posebnim potrebama predškolskog uzrasta sa područja općine Tešanj koristila su usluge Dnevnog centra Tešanj, a djeca sa područja općine Maglaj, pored usluga rane intervencije, koristila su usluge Ustanove „Dnevni centar za djecu s posebnim potrebama“ Maglaj i Doma zdravlja Maglaj.

Sljedeći tabelarni prikaz sadrži informacije o broju održanih podsticajnih jedinica po gradu/općinama, odnosno mjestu stanovanja porodica djece korisnika usluga Javne ustanove:

Tabela 2

Tešanj	Maglaj	Žepče	Zavidovići	Zenica	Kakanj	Visoko	Breza	Olovo	Vareš	Usora	Dobojug
-	8	208,5	124	2774,5	99	350,5	86,5	168,5	52	-	-

Usluge Odjeljenja namijenjene su djeci od rođenja do polaska u školu (do 6 godina starosti) sa područja Zeničko-dobojskog kantona, a kod kojih su prisutna određena odstupanja u razvoju.

Prva usluga koja se omogućava djeci je ulazna dijagnostika, koja predstavlja prvi pregled djeteta, odnosno prvu ranu procjenu djeteta.

Stručni tim ulazne dijagnostike sačinjavaju: psiholog, logoped, edukator-rehabilitator i fizioterapeut, u zavisnosti od stanja/dijagnoze djeteta.

Procjena na ulaznoj dijagnostici vrši se na osnovu opservacije i određenih testova, npr. test motornog razvoja (procjenu vrši fizioterapeut), RTČP-Razvojni test po Čturić (procjenu vrši psiholog), test artikulacije, oralne praksijske (procjenu radi logoped), Razvojna skala Strassmeier-skala razvoja djeteta po starosti (procjenu radi edukator-rehabilitator). Sastavni dio svakog pregleda na ulaznoj dijagnostici je opća opservacija.

Na ulaznu dijagnostiku roditelji/staratelji se javljaju na više načina:

- samoinicijativno- roditelji primjete određeno odstupanje u razvoju djeteta,
- po preporuci ljekara,
- po preporuci odgajatelja u vrtićima,
- po preporuci drugih roditelja.

Na ulaznoj dijagnostici od roditelja se uzimaju anamnestički podaci, koji se sastoje od osnovnih podataka, podataka o trudnoći i porodu i ranom psihomotornom razvoju. Sa roditeljima se također obavi intervju i savjetodavni razgovor, daju im se instrukcije kako dalje postupati i usmjeravati ih na rješavanje određenog problema.

Usluge ulazne dijagnostike pružaju se u prostorijama Odjeljenja Javne ustanove, u prostorijama domova zdravlja i centara za socijalni rad sa područja Zeničko-dobojskog kantona, sa kojima Ustanova ima saradnju.

Odmah na ulaznoj dijagnostici/ prvom pregledu djeteta, počinje primjena usluga zasnovanih na multidisciplinarnom pristupu djetetu, koji se u ranoj intervenciji smatra optimalnim.

Ukoliko roditelji iz nekih razloga ne žele da uključe dijete s ciljem omogućavanja usluga rane intervencije, iako su im preporučene, mogu dobiti smjernice i nalaze za dalji rad sa djetetom na drugom mjestu.

Kao oblik rada, djeci se pružaju individualni i grupni podsticaji ovisno o potrebama i mogućnostima djece. Pri Odjeljenju, korisnicima se pruža adekvatna intenzivna medicinsko-terapeutska, psihološka i edukacijsko-rehabilitacijska podrška kod poremećaja:

1. u vizuelnoj percepciji/vizuomotorici,
2. u kognitivnom razvoju,
3. u učenju i pamćenju,
4. u razvoju govora,
5. u području individualnog socio-emocionalnog razvoja,
6. u somatsko-agilnom području (motorika, mobilnost),
7. u tjelesnom razvoju i progresivnosti uzrastu primjerenih higijenskih uslova,
8. pri polasku u školu (u fazi prelaska iz vrtića/Ustanove u školu).

Pored usluga za djecu predškolskog uzrasta s posebnim potrebama, stručni kadar Odjeljenja, tokom izvještajnog perioda za 2016. godinu, pružio je i sljedeće usluge:

- osnivanje, podržavanje i sprovođenje roditeljskih grupa, te individualno psihološko savjetovanje roditelja,
- po potrebi upućivanje drugim institucijama i stručnjacima,
- razmatranje sa roditeljima/starateljima primjerenih mogućnosti institucionalnog zbrinjavanja njihove djece (vrtić, škola, centar za podsticaj, „Dom porodica” Zenica...), informisanje o istima, te praćenje u njihovoj realizaciji,
- savjetovanje saradnika iz vrtića, drugih centara za podsticaj i škola o razvojnim potrebama djeteta.

Sve navedene usluge uvijek imaju za cilj poboljšanje sposobnosti djeteta (motoričke, kognitivne i emocionalne) i njegovu adekvatnu socijalizaciju u užu i širu zajednicu.

Logoped pruža usluge djeci koja imaju sljedeće poteškoće u razvoju: izgovorne smetnje, kašnjenje u govorno-jezičkom razvoju, odstupanja u fluentnosti govora, prozodij, nerazvijen govor, kao i sva odstupanja u govoru i jezičkom razvoju koja su posljedica intelektualnih teškoća, različitih sindroma, oštećenja sluha, pervazivnih poremećaja, različite malformacije - rascjepi nepca ili usne.

Edukator-rehabilitator pruža usluge djeci sa sljedećim poteškoćama u razvoju i rastu: psihomotornu ometenost (intelektualne teškoće, ometenost u području učenja, nerazvijen govor), pervazivni razvojni poremećaj, oštećenje vida, hiperaktivnost/ ADHD i poremećaj senzorne integracije.

Psiholog pruža usluge djeci sa poteškoćama u socio-emocionalnom razvoju, sa nekontrolisanim emocionalnim ispadima, poteškoćama kod odvajanja od roditelja, poremećajima u ponašanju: agresivno ponašanje i stidljivost/povučenost, poremećaj spavanja, nerazvijena samostalnost, nefunkcionisanje sa vršnjacima, nizak prag tolerancije na frustraciju, noćno mokrenje, strahovi i fobije.

Fizioterapeut pruža usluge djeci koja pokazuju odstupanja u posturalnim refleksima, djecom koja kasne u motornom razvoju: Cerebralna paraliza, Down sindrom, stimulacija djece koja imaju riziko faktore za kašnjenja u motornom razvoju.

S ciljem povećanja dostupnosti navedenih usluga i van prostorija Odjeljenja Javne ustanove u Zenici, stručni kadar djeluje i kao mobilni tim koji usluge omogućava u gradu/općinama Zeničko-dobojskog kantona, i to u: u Dnevnom centru u Žepče, Dnevnom centru u Visokom, Domu zdravlja Visoko, u opremljenoj prostoriji za Dnevni centar pri JU Centar za socijalni rad Olovo, u prostorijama vrtića i JU Centra za socijalni rad u Žepču, u JU „Domu porodica“ u Zenici, kao i/ ili mobilno u porodičnom okruženju i/ili obdaništima, domu, kući staratelja i sl., ovisno o potrebama djeteta i njegove porodice.

Stručni kadar pruža individualne usluge jednom sedmično, u trajanju od jedan sat.

Grupne terapije traju 2 sata, i također se organizuju jednom sedmično. Grupne terapije su:

- Grupa Autizam i
- Grupa - Priprema za polazak u školu

Terapeuti su obavezni, na sedmičnom nivou zakazati 18 podsticaja, a realizovati minimalno 16. Pored direktnog rada sa korisnicima, stručni kadar svakodnevno izrađuju terapijske izvještaje/ zapažanja o njihovom radu sa svakim korisnikom posebno.

Pored djece i odraslih osoba s posebnim potrebama kao naših korisnika, veliki uticaj u procesu rane intervencije imaju roditelji i staratelji, kao i u procesu radnog osposobljavanja i habilitacije i rehabilitacije, koji predstavljaju podsticajnu sredinu od koje dijete i odrasla osoba uči, odnosno brine se o osobi s posebnim potrebama. Jedan od glavnih koraka u radu jeste i rad sa roditeljima-starateljima u obliku pružanja podrške i edukacija.

5. Poslovna jedinica Javne ustanove Dnevni centar Visoko

U martu 2013. godine zvanično počinje rad Dnevnog centra za djecu i odrasle osobe sa posebnim potrebama u Visokom kroz pilot projekat koji je vođen od strane udruženja „Humanost-societas humanitatis“ Zenica, te Zeničko-dobojskog kantona-Ministarstva za rad, socijalnu politiku i izbjeglice i općina sa gravitacionog područja djelovanja; Visoko, Kakanj, Breza i Vareš. Rad centra tokom trogodišnje pilot faze, koja je trajala od marta 2013. do decembra 2015. godine su finansirale Zeničko-dobojskog kantona-Ministarstvo za rad, socijalnu politiku i izbjeglice, općine: Visoko, Kakanj, Breza i Vareš i strani donatori – Aktion Mensch i te CNFCEE (Cooperation of Netherlands Foundations for Central and Eastern Europe) iz Holandije.

U januaru 2016. godine pri JU „Centar za djecu i odrasle osobe s posebnim potrebama Zeničko-dobojskog kantona je formirana Poslovna jedinica Dnevni centar Visoko.

Ugovor o načinu rada i funkcionisanja Dnevnog centra Visoko potpisan je od strane: Zeničko-dobojskog kantona-Ministarstvo za socijalnu politiku i izbjeglice, općine Visoko, Vareš, Breza, Kakanj i Olovo s tim da općine Visoko, Olovo nisu ispunile obaveze u pogledu finansiranja u 2016. godini, dok je Općina Breza izvršila dvije mjesečne uplate, a općina Vareš je naknadno početkom 2017. godine izmirila obaveze za 2016. godinu.

Dnevni centar Visoko sa dvorištem smješten je na ukupnoj površini od 4350 m², a površina samog objekta u kojem djeluje Dnevni centar Visoko je 1087 m² i nalazi se u Dobrinju u općini Visoko. Udaljen je 10 km od Visokog (centra), 10 km od Kakanja, 19,6 km od Breze, te 40,8 km od Vareša. Rad Dnevnog centra Visoko je usmjeren za djecu i odrasle osobe sa posebnim potrebama, te pravo na korištenje usluga istog imaju djeca sa navršених 7 godina starosti, omladina i odrasle osobe sa posebnim potrebama sa područja općina Visoko, Kakanj, Breza i Vareš i Olovo.

Pored grupnog edukacijsko-rehabilitacijskog rada za djecu školskog uzrasta, Dnevni centar Visoko nudi usluge individualnog edukacijsko-rehabilitacijskog, logopedskog i fizioterapeutskog tretmana kroz ambulantni i mobilni oblik rada.

U sklopu rada Dnevnog centra Visoko realizuju se aktivnosti radne rehabilitacije kroz radionička područja: Obrade i prerade tekstila, Obrade i prerade drveta, Domaćinstva i Održavanja vrta i dvorišta. U toku je priprema keramičke radionice za koju je nabavljena peć kroz projekat koji je finansijski podržan od strane Vlade Zeničko-dobojskog kantona putem Ministarstva za rad, socijalnu politiku i izbjeglice u 2016. godini.

U izvještajnom periodu, stručni tim Dnevnog centra Visoko sačinjavao je slijedeći stručni kadar: tri socijalna pedagoga, jednog edukatora-rehabilitatora i jednog socijalnog pedagoga (dva voditelji grupa), stručnog saradnika u radu sa odraslim osobama sa posebnim potrebama, jednog edukatora-rehabilitator (voditelj grupe i kordinator u radu sa djecom školskog uzrasta), dva asistenta (medicinskog i pedagoškog smjera), logopeda i fizioterapeuta u radu sa djecom školske dobi.

Pored stručnog tima u radu sa korisnicima u radionicama su angažovana i 3 radna instruktora u radu sa odraslim osobama sa posebnim potrebama. Od mjeseca decembra 2016. godine, u području radionice "Obrada i prerada tekstila", radni odnos zasnovala je bivša korisnica ovog centra kao krojačica - radni instruktor, putem Fonda za profesionalnu rehabilitaciju i osposobljavanje osoba sa invaliditetom FBiH.

Tehničko osoblje činili su: vozač, kuhar (koji je radio kao radni instruktor u području radionice „Domaćinstvo“), domar, te spremačica (pola norme). Dnevni centar Visoko u saradnji sa organizacijom Eirene iz Njemačke ima i volontera koji pomaže u prevozu korisnika i djelimično preuzima poslove asistiranja u grupi.

Od januara do decembra 2016. godine, u Dnevnom centru Visoko su pružane usluge na slijedeći način:

- grupni rad sa djecom i mladima školskog uzrasta od 6 do 20 godina,
- rad sa odraslim osobama (21 - 46 godina) u vidu radnog osposobljavanja u radioničkim područjima i radno-okupacionog grupnog rada.

Individualni tretmani su se pružali iz oblasti:

- Logopedski podsticaj,
- Fizioterapija,
- Savjetodavni rad sa roditeljima.

U nastavku slijedi pregled o aktivnostima Dnevnog centra Visoko:

a) Edukacijski program

Edukaciju je pohađalo ukupno 37 djece u dobi od 6 do 20 godina starosti, koja sačinjavaju tri grupe: najmlađa grupa (Niži nivo) u dobi od 6 do 10 godina, srednja grupa (Srednji nivo) grupa od 10 do 14 godine i najstarija grupa (Viši nivo) od 15- 18 godina.

Do septembra 2016. godine u primjeni je bio slijedeći raspored grupa: Adaptivni niži nivo (6-10 godina) za djecu koja se tek uključuju u Dnevni centar Visoko, Niži nivo (6-10 godina), te Srednji- Viši nivo (11-20 godina). Sa početkom rada u septembru 2016. godine, rad je formiran po grupama i omogućen je dolazak svih grupa po 5 dana u sedmici. Rad u Odjelu za rad sa djecom školskog uzrasta je koncipiran da brigu o aktivnostima sa djecom vodi kordinator odjeljenja sa svojim timom: voditeljima grupa, asistentima, volonterom i terapeutima (logoped i fizioterapeut).

b) Radionice/ Radna okupacija

Ove usluge Dnevnog centra Visoko pružane su grupi odraslih ljudi (od 21 do 46 godine) sa posebnim potrebama sa područja općina: Visoko, Kakanj, Breza i Vareš kroz radno osposobljavanje.

Rad u radionicama je ostao koncipiran kroz četiri radionice „Tekstil; obrada i prerada“, „Drvo; obrada i prerada“, „Uređenje vrta i zemljišta“ i „Domaćinstvo; Kuhinja i održavanje prostorija“ sa tendencijom opremanja radionice „Keramike“. Radionica „Uređenje vrta i dvorišta“ te radionica „Obrada i prerada drveta“ se radi sa jednom grupom korisnika i realizuje se shodno mogućnostima i vremenskim prilikama. Tokom boravka i rada u Centru

korisnicima su bili obezbijeđeni užina i topli obrok (koji je rađen zajedno sa grupom koja je zadužena za rad u radionici „Domaćinstvo“).

Struktura rada u Odjelu za rad sa odraslim osobama sa posebnim potrebama je takva da brigu o aktivnostima vodi koordinator odjela koji obavlja ujedno poslove i rukovodioca Dnevnog centra Visoko i stručnog saradnika u radu sa radnim instruktorima.

c) Individualni podsticaji

- **Logopedski podsticaj** u toku godine uživalo je 27 korisnika. Ostvareno je 557 podsticaja. Logoped je po potrebi radio poslove i asistenta u grupi. Pored ambulantnog oblika rada u Dnevnom centru Visoko, omogućen i mobilni oblik rada koristeći prostorije JU Centar za socijalni rad u Varešu. Na taj način se odgovorilo na potrebe logopedskog tretmana sa djecom koja pohađaju nastavu u redovnim školama po redovnom ili prilagođenom nastavnom planu i programu.

- **Fizioterapija** je ostvarena sa 19 korisnika. U periodu januar-decembar 2016. godine ostvareno je 467 fizioterapeutskih podsticaja. Ovaj vid podsticaja realizovan je kroz ambulantni i mobilni oblik rada. Fizioterapeut povremeno u toku sedmice obavlja i poslove asistiranja u grupnom obliku rada.

- **Individualni edukacijsko-rehabilitacijski podsticaji** realizuju se do kraja 6. mjeseca u prostorijama Dnevnog centra Visoko sa tri korisnika. Jedan korisnik je korisnik i grupnog oblika rada za kojeg je procijenjeno da mu zbog težine oštećenja bude omogućen i individualni tretmanski oblik rada kao dodatni podsticaj. U ovom periodu ostvareno je 43 podsticaja.

U 2016. godini uspješno su realizovani i sljedeći projekti:

- Izgradnja prilagođenog igrališta za korisnike uz asfaltiranje prilaza Centru, projekat Udruženja „Humanost“,
- Realizovani projekti u saradnji sa Udruženjem „Damar omladine“,
- Printanje edukativnih brošura o Autizmu u saradnji sa Institutom za zdravlje i sigurnost hrane Zenica,
- Projekat u saradnji sa Općinom Kakanj i Gradskom bibliotekom općine Kakanj,
- Projekat u saradnji sa World Vision Zenica.

Prvi petak u aprilu organizovan je kao Dan otvorenih vrata sa prigodnim programom za goste i priredbom u izvedbi korisnika sa predstavom „Labuđe jezero u svijetu naše mašte“.

Krajem godine privodile su se kraju aktivnosti nabavke novog vozila u Dnevnom centru Visoko za potrebe prevoza korisnika, a u organizaciji udruženja „Humanost“ i „Naše sunce“ Visoko, koji su preko donacija obezbijedili novac za vozilo. Vozilo će biti u funkciji za potrebe prevoza djece, a posebno korisnika sa područja općine Kakanj čime će se rasteretiti dosadašnji kombi a i omogućiti prevoz i drugima koji tu privilegiju ranije nisu koristili.

U 2016. godini ostvarena je značajna saradnja sa roditeljima tako da korisnici koji se mogu koristiti javnim prevozom dolaze i odlaze iz Dnevnog centra Visoko samostalno autobusom što je značajan korak u njihovoj samostalnosti i socijalizaciji.

Dnevni centar je u 2016. godini bio domaćin posjetama iz Njemačke, organizacija Lebenshilfe Plauen i Terra Tech, Ministarstvu za rad, socijalnu politiku i izbjeglice Zeničko-dobojskog kantona, Premijeru Zeničko-dobojskog kantona, predstavnicima drugih centara i ustanova sličnog tipa, O.Š. „Mehmedalija Mak Dizdar“ Visoko i klub ritmičke gimnastike

Piruetu Visoko, organizacijama World Vision, Damar Omladine, „Naše sunce“ Visoko, Zvezdica, Centar za djecu i mladež sa poteškoćama u razvoju „Duga“ Novi Travnik - podružnica Kiseljak, JU Zavod za zbrinjavanje mentalno invalidnih lica „Drin“ Fojnica, predstavnika centara za socijalni rad i lokalnih udruženja.

6. Poslovna jedinica Javne ustanove Dnevni centar Tešanj

Dnevni centar Tešanj se finansira djelimično iz Budžeta Zeničko-dobojskog kantona, a dijelom iz Budžeta Općine Tešanj. Ugovor o načinu rada i funkcionisanju Dnevnog centra Tešanj potpisan je od strane Zeničko-dobojskog kantona-Ministarstvo socijalne politike i izbjeglica, Općine Tešanj i Javne ustanove u martu 2016. godine, s tim da Općina Usora i Općina Doboj Jug nisu pristupile potpisivanju istog iako je predviđeno da usluge ovog centra koriste i djeca i odrasle osobe s posebnim potrebama sa područja navedenih općina.

Objekat Dnevnog centra Tešanj se nalazi u ulica Hajrudina Hajrića bb., općina Tešanj, a poslovne prostorije su ukupne površine 278,79 m². Objekat je izgrađen od donacije vlasnika kompanije HIFA Petrol Tešanj.

Usluge Dnevnog centra Tešanj su namijenjene djeci i mladima predškolskog uzrasta, kao i školskog uzrasta od 6 do 18 godina, te odraslim osobama starijim od 18 godina u vidu radnog osposobljavanja u radioničkim područjima i radno-okupacionog grupnog rada. Individualni tretmani su se pružali iz oblasti logopedskog podsticaja, fizioterapije i savjetodavnog rada sa roditeljima.

Dnevni centar Tešanj je pohađalo ukupno 23 djece u dobi od 6 do 18 godina koja sačinjavaju tri grupe: najmlađa grupa (Niži nivo) u dobi od 6 do 10 godina, srednja grupa (Srednji nivo) grupa od 11 do 14 godine i najstarija grupa (Viši nivo) od 15 do 18 godina.

Rad u grupi sa ovim korisnicima zasnovan je na jedinstvenom planu i programu za izvođenjem nastave u sklopu svih poslovnih jedinica JU Centar za djecu i omladinu s posebnim potrebama ZDK. Voditelj grupe, edukator-rehabilitator i asistent logoped, je zajedno sa kolegama iz ostalih dnevnih centara Javne ustanove aktivno učestvovao na donošenju i pripremi plana i programa za ove grupe korisnika.

U nastavku slijedi pregled o aktivnostima Dnevnog centra Tešanj:

a) Radna rehabilitacija

Radna rehabilitacija podrazumijeva rad s korisnicima starijim od 18 godina, a realizuje se putem rehabilitacijsko-terapeutskih aktivnosti. Cilj je da odrasli korisnici razvijaju motoričku spretnost, kreativno izražavanje i samostalnost, te da steknu veće samopouzdanje, da se smanje negativni učinci simptoma ometenosti, te razvijaju socijalne kompetencije korisnika. Za potrebe korisnika formirane su sljedeće radionice: „*Drvoprerađivačka radionica*“, radionica „*Domaćinstva*“ (kuhinja i održavanja prostora), radionicu „*Uređenja vrta i zemljišta*“.

Voditelj radionica je socijalni pedagog, koji u namjenski opremljenim radionicama, zajedno sa korisnicima, pored teoretske edukacije, vrši izradu različitih predmeta od drveta kao finalnog proizvoda za svakodnevnu upotrebu. Rad sa odraslim korisnicima podrazumijeva i svakodnevnu rehabilitaciju za samostalan život i izvršavanje svakodnevnih aktivnosti u domaćinstvu. Ova grupa broji 11 odraslih korisnika.

b) Individualni podsticaji

Logopedski podsticaj u izvještajnom periodu od 01.04.2016.-31.12.2016. godine uživalo je 19 korisnika. Ostvareno je 394 podsticaja. Logoped je radio poslove i asistenta u radu sa korisnicima školskog uzrasta. Pored rada u redovnoj grupi korisnika koji samo koriste individualne podsticaje, logoped je radio i individualne podsticaje sa djecom koja pohađaju nastavu u redovnim školama po prilagođenom nastavnom planu i programu i time odgovorio na potrebe logopedskog tretmana za ovu grupu korisnika. Logoped je redovno davao usluge i podsticaje za korisnike usluge rane intervencije.

Zbog nedostatka tehničkog kadra i reorganizacijom poslova, logoped je vršio i spremanje obroka za korisnike Dnevnog centra Tešanj, kao i čišćenje prostorija ovog centra.

Individualni edukacijsko-rehabilitacijski podsticaji realizovani su u prostorijama Dnevnog centra Tešanj za 23 korisnika. 11 korisnika je koristio podsticaje grupnog oblika rada za koje je procijenjeno da im zbog težine ometenosti bude omogućen i individualni tretmanski oblik rada kao dodatni podsticaj. U ovom periodu ostvareno je 162 podsticaja. Pored rada u redovnoj grupi korisnika koji samo koriste individualne podsticaje, edukator-rehabilitator je radio i individualne podsticaje sa djecom koja ne pohađaju nastavu u redovnim školama i time odgovorio na potrebe nedostatka usluga koje pruža edukator-rehabilitator. Edukator-rehabilitator je redovno davao usluge i podsticaje za korisnike usluge rane intervencije. Usluge rane intervencije i podsticanja je koristilo 8 djece sa područja općine Tešanj.

Zbog nedostatka tehničkog kadra i reorganizacijom poslova edukator-rehabilitator zajedno sa logopedom je vršio i spremanje obroka za korisnike Dnevnog centra Tešanj, kao i čišćenje prostorija ovog centra.

Individualni fizioterapeutski podsticaji realizovani su u prostorijama Dnevnog centra Tešanj sa 5 korisnika. U ovom izvještajnom periodu ostvareno je 117 podsticaja. Pored rada u redovnoj grupi korisnika koji samo koriste individualne podsticaje, fizioterapeut je radio i individualne podsticaje sa djecom koja pohađaju nastavu u redovnim školama po prilagođenom nastavnom planu i time odgovorio na potrebe nedostatka usluga koje su neophodne korisnicima zbog specifičnih oboljenja ili tjelesne ometenosti. Fizioterapeut je redovno davao usluge i podsticaje za korisnike usluga rane intervencije i angažovan je kao asistent u radionicama.

Zbog nedostatka tehničkog kadra i reorganizacijom poslova fizioterapeut je obavljao aktivnosti kao koordinator Dnevnog centra Tešanj i vršio prijevoz korisnika.

Logopedске podsticaje je koristilo 19 korisnika, usluge fizioterapeuta 5 korisnika, a individualne edukacijsko-rehabilitacijske podsticaje 23 korisnika.

7. Dnevni centar Javne ustanove za odrasle osobe s posebnim potrebama Zenica-istureni dio

Od septembra 2016. godine, Javna ustanova je organizovala rad Dnevnog centra u Zenici, za korisnike starosne dobi preko 21 godine. Naime, ovi korisnici su do navršene 21 godine imali pravo korištenja usluga u okviru projekta Dnevnog centra pri JU Škola za odgoj i obrazovanje osoba sa poteškoćama u Zenici. Obzirom da korisnici u školskoj 2016/2017. godini nisu mogli nastaviti koristiti usluge navedene škole, Javna ustanova u saradnji sa Ministarstvom za rad, socijalnu politiku i izbjeglice Zeničko-dobojskog kantona organizuje pružanje usluga za ove korisnike, njih 14.

Rad sa ovim korisnicima obavlja se u prostorijama JU „Dom porodica“ Zenica. Rad obavljaju dva uposlenika, edukator-rehabilitator i asistent.

U ovom Dnevnom centru pružaju se usluge edukacije i rehabilitacije u radnom nivou u kojem se korisnici pripremaju za prelazak na radno osposobljavanje ili druge vidove zbrinjavanja odraslih osoba s posebnim potrebama. U tom smislu, radi se na razvijanju sposobnosti korisnika za brigu o sebi i svakodnevne aktivnosti kako bi bili što samostalniji.

Svake naredne školske godine očekuje se povećanje broja korisnika za Dnevni centar u Zenici, što je znak da se mora raditi na osiguravanju prostora za rad, kao i pitanje povećanja broja uposlenika u ovom Dnevnom centru.

8. Saradnja Javne ustanove sa drugim ustanovama, udruženjima i stranim partnerima

Tokom 2016. godine je Javna ustanova je ostvarila značajnu saradnju sa nizom drugih udruženja, partnera i donatora. Neki od njih su Udruženje „Naše sunce“ (projekat nabavke vozila za potrebe DCV), Ustanova „Dnevni centar za djecu sa posebnim potrebama“ Maglaj, Islamski pedagoški fakultet (čiji studenti obavljaju praksu u Javnoj ustanovi), organizacije Lebenshilfe Plauen iz Njemačke (okrugli stol - Organizacija rane intervencije i radionica u Lebenshilfe Plauen), organizacija Terra Tech iz Njemačke i Udruženje Humanost (projekat uređenja igrališta za korisnike Dnevnog centra Visoko), JU Predškolski odgoj i obrazovanje Zenica i JU „Dom porodica“ Zenica (obilježavanje Međunarodnog dana osoba sa Down sindromom), vrtići Žepče (obilježavanje Svjetskog dana autizma), BH Telecom d.d. (donacija za nabavku opreme za senzornu sobu), Društvo socijalnih radnika Zeničko-dobojskog kantona i Srednjobosanskog kantona (Konferencija o ranoj intervenciji i vaninstitucionalnom smještaju djece i odraslih osoba sa posebnim potrebama), O.Š. „Mehmedalija Mak Dizdar“ Visoko i klub ritmičke gimnastike Pirueta Visoko (organizacija Dana otvorenih vrata) kao i mnogi drugi.

Posebno je potrebno naglasiti značaj saradnje između institucija/ ustanova, udruženja i donatora, koja je rezultirala izgradnjom zgrade Dnevnog centra za djecu i odrasle osobe s posebnim potrebama u općini Žepče, za korisnike iz općina Žepče, Maglaj i Zavidovići. Partneri u realizaciji ovog projekta su: Zeničko-dobojski kanton-Ministarstvo za rad, socijalnu politiku i izbjeglice, Javna ustanova Centar za djecu i odrasle osobe s posebnim potrebama Zeničko-dobojskog kantona, Općina Žepče, Ustanova „Dnevni centar za djecu sa posebnim potrebama“ Maglaj, Udruženje „Humanost – societas humanitatis“ Zenica, SR Njemačka i dr. donatorske organizacije. Ovaj projekat je predstavljao osnov za pokretanje procedura za pripajanje Ustanove „Dnevni centar za djecu sa posebnim potrebama“ Maglaj – Javnoj ustanovi Centar za djecu i odrasle osobe s posebnim potrebama Zeničko-dobojskog kantona. U oktobru 2016.godine završeno je opremanje prostorija Dnevnog centar Žepče/Maglaj.

S tim u vezi, Skupština Zeničko-dobojskog kantona je na 35. sjednici održanoj 23. i 28.12.2016. godine, donijela Odluku o statusnoj promjeni pripajanje Ustanove „Dnevni centar za djecu sa posebnim potrebama“ Maglaj, Javnoj ustanovi Centar za djecu i odrasle osobe s posebnim potrebama Zeničko-dobojskog kantona.

9. Rezime

U toku 2016. godine, Javna ustanova Centar za djecu i odrasle osobe s posebnim potrebama ZDK je obavljala poslove ranog podsticanja razvoja i rane intervencije za djecu s posebnim

potrebama, poslove dnevnog zbrinjavanja djece i odraslih osoba s posebnim potrebama u poslovnim jedinicama Dnevni centar Visoko i Dnevni centar Tešanj i Odjeljenju za rano podsticanje razvoja i ranu intervenciju djece s posebnim potrebama, te Dnevnom centru Zenica.

Tokom izvještajnog perioda, nije bilo pritužbi na obavljanje djelatnosti. Svi poslovi su obavljani stručno i na vrijeme.

Ustanova je krajem godine poduzela potrebne radnje za pripajanje Ustanove „Dnevni centar za djecu sa posebnim potrebama“ Maglaj u Javnu ustanovu, što podrazumijeva pružanje usluga za nove korisnike i organizaciju rada u dva centra, odnosno u Dnevnom centru u Žepču i Maglaju. U ovim centrima usluge će se pružati po principu usluga u postojećim dnevnim centrima Javne ustanove, tj. po nivoima na osnovu uzrasta, i u radionicama sa odraslim korisnicima.

Prijem u Dnevne centre se vrši nakon upućivanja korisnika po nalazu Stručne prvostepene komisije i na osnovu upućivanja iz Rane intervencije.

Prijem korisnika se realizuje na osnovu Rješenja i Saglasnosti koju potpisuje roditelj/staratelj i direktor Ustanove, čime je regulisan status korisnika Ustanove.

Ustanova će, u narednom periodu, nakon izvršene integracije svih dnevnih centara u općinama/gradu Zeničko-dobojskog kantona, u skladu sa dostignućima savremenog svijeta, nastaviti razvijati svoju djelatnost u cilju što bolje zaštite djece i odraslih osoba s posebnim potrebama.

Naglašavamo da Javna ustanova, bez obzira na neadekvatno izvršavanje obaveza finansiranja od strane određenih općina, nije uskratila usluge korisnicima sa područja tih općina.

S tim u vezi, Javnoj ustanovi je neophodna podrška kako bi se omogućio kontinuitet i dalji razvoj usluga, te jačanja kapaciteta Javne ustanove, sa posebnim naglaskom na adekvatno učešće u finansiranju rada Javne ustanove od strane grada/općina sa područja Zeničko-dobojskog kantona koje to nisu izvršavale u 2016. godini, a sve u najboljem interesu djece i odraslih osoba s posebnim potrebama.

v. d. DIREKTOR

PREDSJEDNIK UPRAVNOG ODBORA

Kanita Sarajlić

Faruk Smajević

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
JU CENTAR ZA DJECU I ODRASLE OSOBE S POSEBNIM POTREBAMA

Broj: 01-05-5-6-1/17
Zenica, 09.06.2017. godine

**Finansijski izvještaj
Javne ustanove Centar za djecu i odrasle osobe s posebnim potrebama
Zeničko-dobojskog kantona
za period januar-decembar 2016. godine**

Zenica, juni 2017. godine

Sadržaj:

1. Uvod.....	3
2. Poslovanje Odjeljenja za ranu intervenciju i rano podsticanje razvoja u Zenici.....	3
3. Poslovanje JU Centar za djecu i odrasle osobe s posebnim potrebama, PJ Dnevni centar Visoko	5
4. Poslovanje JU Centar za djecu i odrasle osobe s posebnim potrebama, PJ Dnevni centar Tešanj	6
5. Zaključak	6

1. Uvod

JU Centar za djecu i odrasle osobe s posebnim potrebama ZDK je 2016. godine poslovala sa osnivačkim kapitalom od 49.250,00 KM i imovinom u neto vrijednosti od 139.012,00 KM. U toku 2016. godine je izvršena donacija opreme i sitnog inventara u vrijednosti 67.713,80 KM, te nabavka stalnih sredstava u vrijednosti 22.777,35 KM. Vrijednost sitnog inventara i HTZ opreme je na dan 31.12.2016. godine bila 5.255,55 KM, a zaliha hrane 9.042,97 KM.

Tokom 2016. godine je JU Centar za djecu i odrasle osobe s posebnim potrebama ZDK je poslovala solventno, te je na transakcijskom računu banke na dan 31.12.2016. godine imala 34.954,57 KM.

2. Poslovanje Odjeljenja za ranu intervenciju i rano podsticanje razvoja u Zenici

JU Centar za djecu i odrasle osobe s posebnim potrebama ZDK je u toku 2016. godine u svrhu finansiranja Odjeljenja za ranu intervenciju i ranog podsticanja razvoja u Zenici imala potpisane ugovore sa općinama Breza, Kakanj, Olovo, Vareš, Zavidovići, Žepče, Tešanj i Zenica. Pregled uplata po općinama je naveden u tabeli 1.1.

Ostale prihode, pored uplata iz budžeta ZDK i općina, su činile donacije novčanih sredstava ili opreme u iznosu od 12.660,49 KM.

U toku 2016. godine JU Centar za djecu i odrasle osobe s posebnim potrebama ZDK, Odjeljenje za ranu intervenciju i rano podsticanje razvoja je imalo 12 zaposlenika.

Za neto plate zaposlenih u 2016. godini izdvojeno je 126.883,33 KM, za topli obrok 17.224,00 KM, prevoz na posao 1.149,04 KM, te doprinose 111.865,96 KM, što čini ukupani iznos od 239.898,33 KM.

Za neto isplate po osnovu ugovora o djelu i isplatama komisijama su izdvojeni iznosi od 10.595,00 KM, a za pripadajuće doprinose iznos od 2.249,54 KM.

Neto naknade članovima Nadzornog odbora su iznosile 2.000,00 KM, a pripadajući doprinosi 473,72 KM, dok su neto naknade članovima Upravnog odbora iznosile 8.200,00 KM, a pripadajući doprinosi 1.942,25 KM.

Troškovi Odjeljenja za ranu intervenciju i rano podsticanje razvoja u 2016. godini su iznosili 55.141,98 KM, od čega su najznačajniji troškovi režija (trošak grijanja u iznosu od 15.274,48 KM, el.energije 1.448,46 KM, telefonskih usluga 2.546,41 KM), trošak goriva u iznosu 3.298,21 KM, knjigovodstvenih usluga u iznosu 6.000,00 KM, itd.

Tabela 1.1.

	ZDK	OPĆINA TEŠANJ	GRAD ZENICA	OPĆINA ŽEPČE	OPĆINA ZAVIDO- VIĆI	OPĆINA VISOKO	OPĆINA VAREŠ	OPĆINA USORA	OPĆINA OLOVO	OPĆINA MAGLAJ	OPĆINA KAKANJ	OPĆINA DOBOJ JUG	OPĆINA BREZA	UKUPNO
JANUAR	13.166,67	-	1.691,25	413,64	505,82		282,77		167,36		576,17		379,10	17.182,78
FEBRUAR	20.715,63	1.239,84	1.691,25	413,64	505,82				325,24		1.118,65		379,10	26.389,17
MART	20.715,63	1.239,84	1.691,25	413,64	505,82				325,24		1.118,65			26.010,07
APRIL	20.715,63	1.239,84	1.691,25	413,64	505,82				325,24		1.118,65			26.010,07
MAJ	20.715,63	1.239,84	1.691,25	413,64	505,82				325,24		1.118,65			26.010,07
JUNI	20.715,63	1.239,84	1.691,25	413,64	505,82				325,24		1.118,65			26.010,07
JULI	20.715,63	1.239,84	1.691,25	413,64	505,82				325,24		1.118,65			26.010,07
AUGUST	20.715,63	1.239,84	1.691,25	413,64	505,82				325,24		1.118,65			26.010,07
SEPTEMBAR	20.715,63	1.239,84	1.691,25	413,64							1.118,65			25.179,01
OKTOBAR	20.715,63	1.239,84	1.691,25	413,64							1.118,65			25.179,01
NOVEMBAR	20.715,63	1.239,84	1.691,25	413,64							1.118,65			25.179,01
DECEMBAR	20.715,63	1.239,84	1.691,25	413,64							1.118,65		379,10	25.558,11
UKUPNO 2016.	241.038,60	13.638,24	20.295,00	4.963,68	4.046,56		282,77		2.444,04		12.881,32		1.137,30	300.727,51

3. Poslovanje JU Centar za djecu i odrasle osobe s posebnim potrebama, PJ Dnevni centar Visoko

JU Centar za djecu i odrasle osobe s posebnim potrebama ZDK, PJ Visoko je u toku 2016. godine imala potpisan ugovor za finansiranje sa općinama Breza, Kakanj, Olovo i Vareš.

Pregled uplata po općinama je naveden u tabeli 1.2.

Tabela 1.2.

	ZDK	OPĆINA VISOKO	OPĆINA VAREŠ	OPĆINA OLOVO	OPĆINA KAKANJ	OPĆINA BREZA	UKUPNO
JANUAR	16.807,92				2.990,14	1.013,52	20.811,58
FEBRUAR	16.807,92				2.990,14		19.798,06
MART	16.807,92				2.990,14		19.798,06
APRIL	16.807,92				2.990,14		19.798,06
MAJ	16.807,92				2.990,14		19.798,06
JUNI	16.807,92				2.990,14		19.798,06
JULI	16.807,92				2.990,14		19.798,06
AUGUST	16.807,92				2.990,14		19.798,06
SEPTEMBAR	16.807,92				2.990,14		19.798,06
OKTOBAR	16.807,92				2.990,14		19.798,06
NOVEMBAR	16.807,92				2.990,14		19.798,06
DECEMBAR	16.807,92				2.990,14	1.013,52	20.811,58
UKUPNO 2016.	201.695,04				35.881,68	2.027,04	239.603,76

Ostale prihode, pored uplata iz Budžeta ZDK i općina, su činile poticaji i sponzorstva, donacije novčanih sredstava ili opreme u iznosu od 45.666,55 KM.

U toku 2016. godine, PJ Dnevni centar Visoko je imala 14 zaposlenika. Za njihove neto plate je izdvojeno 123.459,89 KM, za topli obrok 21.080,00 KM, a za prevoz na posao 6.042,07 KM.

Doprinosi na plate su bili u iznosu 87.635,40 KM, što čini ukupan iznos od 238.217,36 KM. Za ugovore o djelu su isplaćeni neto iznosi od 4.350,00 KM, a za doprinose po tom osnovu iznos od 703,05 KM.

Rashodi tj. troškovi su iznosili 57.437,48 KM, od čega je najznačajniji trošak nabavke hrane – 19.352,80 KM, goriva (5.676,23 KM), komunalnih usluga (8.992,17 KM), materijala za radionicu (6.150,03 KM) i drugi.

Od septembra 2016. godine pod okriljem PJ Visoko posluje i Dnevni centar u Zenici, u kojem su zaposlene 2 osobe, i za čije finansiranje je ZDK u 2016. godini izdvajao mjesečni iznos od 10.000,00 KM.

4. Poslovanje JU Centar za djecu i odrasle osobe s posebnim potrebama, PJ Dnevni centar Tešanj

Dnevni centar za djecu i odrasle s posebnim potrebama Tešanj formiran je kao poslovna jedinica JU Centar za djecu i odrasle osobe s posebnim potrebama ZDK 01.04.2016. godine. Dnevni centar se finansira djelimično iz Budžeta Zeničko-dobojskog kantona, a dijelom iz Budžeta općine Tešanj. Sa općinama Usora i Doboj-Jug Dnevni centar još uvijek nema potpisane ugovore o finansiranju. Pregled uplata po općinama je dat u tabeli 1.3.

Tabela 1.3.

	ZDK	OPĆINA TEŠANJ	OPĆINA USORA	OPĆINA DOBOJ JUG	UKUPNO
JANUAR					
FEBRUAR					
MART					
APRIL	5.418,79	2.186,76			7.605,55
MAJ	5.418,79	2.186,76			7.605,55
JUNI	5.418,79	2.186,76			7.605,55
JULI	5.418,79	2.186,76			7.605,55
AUGUST	5.418,79	2.186,76			7.605,55
SEPTEMBAR	5.418,79	2.186,76			7.605,55
OKTOBAR	5.418,79	2.186,76			7.605,55
NOVEMBAR	5.418,79	2.186,76			7.605,55
DECEMBAR	5.418,79	2.186,76			7.605,55
UKUPNO 2016.	48.769,11	19.680,84			68.449,95

Prihodi od donacija za PJ Tešanj su u 2016. godini iznosili 2.364,63 KM.

U toku 2016. godine, Dnevni centar u Tešnju je imao 4 zaposlenika za čije neto plate je izdvojeno 29.148,88 KM, za topli obrok je isplaćeno 4.856,00 KM, a za prevoz na posao 251,13 KM. Doprinosi su isplaćeni u iznosu 21.535,53 KM, što čini ukupnu cifru od 55.540,41 KM.

Za ugovore o djelu u Dnevnom centru Tešanj je isplaćena neto suma od 2.100,00 KM, a na ime doprinosa je po tom osnovu isplaćeno 390,45 KM.

Rashodi PJ Tešanj u 2016.godini su iznosili 15.256,44 KM, od čega su najznačajnije stavke hrana (4.241,22 KM), grijanje (5.811,54 KM), gorivo (2.615,62 KM), el.energija (1.142,51 KM) i dr.

5. Zaključak

JU Centar za djecu i odrasle osobe s posebnim potrebama ZDK je poslovala sa pozitivnim finansijskim rezultatom u toku 2016. godine, koji je predstavljen u Bilansu stanja i uspjeha. Međutim, to stanje nije realno ako se uzme u obzir činjenica da 3 općine ZDK nisu uopće potpisale Ugovore o sufinansiranju, a da većina općina koje jesu potpisale Ugovor nisu izvršavale svoje obaveze na vrijeme. Također, bitno je napomenuti da su većina obaveza koje su općine imale za 2015.godinu, izmirene u prvom kvartalu 2016. godine, što je također prikazano kao dobit u 2016. godini.

Za sve ovo vrijeme, Javna ustanova Centar za djecu i odrasle osobe s posebnim potrebama ZDK, nije uskraćivala usluge korisnicima ni jedne općine, potpisnice ili nepotpisnice Ugovora o sufinansiranju, što znači da je uredno izvršavala svoj primarni zadatak, tj. rad sa osobama s posebnim potrebama.

Kao prioriteti finansijske politike JU u budućnosti su i obezbjeđenje prihoda, bolja naplata potraživanja od strane općina koje su potpisale ugovore o finansiranju, kao i potpisivanje ugovora sa onim općinama ZDK koje ugovore nisu željele potpisati, posebno zbog činjenice da je od januara 2017.godine Javnoj ustanovi pripojena Poslovna jedinica Dnevni centar za djecu i odrasle osobe s posebnim potrebama Žepče/Maglaj.

PREDSJEDNIK UPRAVNOG ODBORA

v. d. DIREKTOR

Faruk Smajević

Kanita Sarajlić